

長沙縣志

第拾貳冊

卷之二十三

人物一

卷之二十四

人物二

長沙縣志卷之二十三

人物一

楚國先賢襄陽耆舊自昔皆有紀述長邑山川秀發賢哲代生新舊入祀鄉賢者固已列其懿行請於

朝廷矣其他學古有獲或出或處德行才望流播齒芬皆當采輯以志不諼至於窮檐委巷目不覩詩書而一節之善無愧古人者尤不忍聽其湮沒亟錄之以彰至性在人賢愚一致抑卜氏所云未學而必謂之學者已志人物

長沙縣志

卷之二十三

人物一

一

漢

古初光武時人遭父喪未葬鄰家失火初匍匐樞上以身捍火火爲滅太守郅惲甄異首舉之

國朝雍正三年奉

敕鐫碑於忠義祠曰漢孝子古初

祝良順帝時洛陽令值大旱暴身自責雨如注時太尉龐參繼妻斃前妻子於井良案實發罪有司以良不先奏輒辱宰輔詔逮獄洛陽吏民守闕請代詔原之出補九真太守時南徼蠻區凌犯象林殺長吏良單騎入賊中招降嶺外悉平

按祝良漢書作長沙人一統志作臨湘人臨湘固長沙舊名也又考後漢書長沙祝良爲洛陽令常侍樊豐殺侍婢

置井中良收其妻殺之此事與龐參事相類殺子殺婢良皆收治以廉平見稱舊志本漢書作長沙人而遺收治殺婢事楚紀作湖廣湘鄉人東漢時湘鄉屬零陵罷則楚紀誤矣府志作瀏陽人蜀漢始置瀏陽縣兩漢時無瀏陽縣名府志又誤矣附正之

劉壽少時遇相師相曰凡鼻爲氣戶君鼻大貴之相後仕至太尉朝野稱賢

文虔字仲儒爲郡功曹時霖雨民業廢太守憂悒召虔補戶曹掾虔奉教齋戒在社三日夢見白頭翁謂曰爾來何遲虔具白所夢太守曰昔禹夢青繡衣男子稱滄水使者禹知水脈當通若掾此夢將其比也明日果大霽

長沙縣志

卷之二十三

人物一

二

虞芝州命辟南陽從事太守張忠連姻王室罪名入重芝依法執按刺史畏勢召芝芝曰吾年往志盡譬如八百錢馬死生同價且欲立效於明時耳遂投傳去

按上三人依劉彧長沙耆舊傳補入

陳平子與金鄉范式同到京師受業太學未相見而平子病將亾謂其妻曰吾聞山陽范巨卿烈士也可以託死吾沒後以屍埋巨卿戶側乃裂素爲書遺之時式出行還省書感愴向墳揖哭以爲死友乃營護平子妻兒自送喪於臨湘未至四五里許委素書柩上哭別而去

續志論曰一死一生乃見交情傾蓋班荆吐肺腑於覲面而後墓有宿草久要不忘故劍掛徐君之墓心許張堪之

言吳季朱季風高千古陳平子何人悠悠太學握手識面
日凡幾輩有一范巨卿顧不能結金蘭契迨旅殯是虞乃
欲借毫素以絮話託死友於冥契危哉殆未敢恃也巨卿
天下義士豈爲名怵實用心愴覽書涕泣冥漠中忍負死
友遺齒弱息閒關輾轉爲人難爲徽紹二季已抑陳平子
亦知士歟夫賢者所至譬如麟鳳芝菌邑里爭相誇耀故
范式本非長沙人而傳志轉相沿襲遂舍陳平子而錄范
式訛有自來矣

桓勝三國志桓階傳注階祖父超父勝皆歷典州郡勝爲尙
書著名南方

蜀漢

長沙縣志

卷之二十三

人物一

三

桓階字伯緒勝子初爲郡功曹太守孫堅舉階孝廉除尙書
郎父喪還鄉里會堅擊劉表戰死階冒難乞堅喪表義而與
之後曹操與袁紹相拒劉表舉州應紹階說太守張羨拒紹
歸操表攻羨死階遂自匿久之表辟爲祭酒欲妻以妻妹階
拒之後操辟爲丞相掾主簿遷郡太守文帝時累官至尙書
令封高鄉亭侯徙封樂鄉侯邑六百戶卒諡曰貞子祐早卒
追贈關內侯次子嘉嗣尙升遷亭公主弟纂散騎侍郎賜爵
關內侯三子會嘉平中以樂安太守與吳戰沒諡曰壯侯子
翊嗣

國朝雍正三年奉

敕鐫姓名於忠義祠碑曰漢孝子尙書令樂鄉侯桓階

按階有三子通志僅書嘉而遺祜會且誤以壯侯爲嘉諡
今據史補正之

黃忠字漢升南陽籍世居長沙建安時與太守韓元協力守
城劉備遣關某定長沙忠歸漢年已六十屢立奇功臨陣當
先陷陣辟易萬人善騎射能百步穿楊列五虎將內爵關內
侯以壽終世傳長沙衛治忠故宅也其盔甲器械俱貯北門
城樓明時巡按遣推官查驗通報焉後燬於兵

按府志黃忠改入名宦以蜀志忠南陽人未云產長沙也
查益陽志桂香橋有忠祖墓荆棘成叢人或犯之則虺蛇
立至故舊志載忠南陽籍世居長沙長沙衛治係忠故宅
未爲無徵今仍舊志錄入

長沙縣志

卷之二十三

人物一

四

晉

桓陵三國志世語階孫陵字元徽有名於晉武帝時官至祭
陽太守卒

虞悝兄弟並有士操孝弟廉信爲州里所稱元帝永昌中王
敦舉兵反譙王司馬承爲湘州刺史

承音拯與
拯同義

檄悝爲長史

悝遭母喪承往弔之曰王室方難國祚阽危墨衰卽戎金革
之事古人所不辭將何以教之悝曰鄙州荒敝難以進討宜
收眾固守傳檄四方敦勢必分分而圖之庶可捷也及敦遣
部將魏乂陷長沙悝被執子弟對之號泣悝曰人生會有死
今闔門爲忠義之鬼夫復何恨及敦平詔贈襄陽太守遣使
者祭其墓以少牢

國朝雍正三年奉

敕鑄姓名於忠義祠碑曰晉忠臣長史贈襄陽太守虞悝

虞望悝之弟也爲譙王承督護諸軍王敦作逆朝命承領兵承以望兄弟忠義信之湘東太守鄭澹敦姊夫以其弗狎於國命望討之望整軍奮勇斬澹以徇及敦遣魏乂來攻望率兵與戰終於國難敦平詔贈鄖陽太守遣使祭其墓
桓雄永昌中承命爲臨湘縣主簿承爲魏乂所執佐吏奔散雄與西曹韓階從事武延並毀服爲僮隨承武昌乂見雄姿貌頎長進退有禮知非凡人有畏憚之色因害之

國朝雍正三年奉

敕鑄姓名於忠義祠碑曰晉忠臣臨湘縣主簿桓雄

長沙縣志

卷之二十三

人物一

五

韓階廉謹篤慎素爲閭里所敬愛承辟爲議曹祭酒轉西曹書佐及承爲魏乂執送武昌階與桓雄武延同心隨承左右雄被害階延執志愈固及承遇禍階延營殯送柩還朝夕哭奠葬畢乃還

國朝雍正三年奉

敕鑄姓名於忠義祠碑曰晉忠義議曹祭酒韓階

鄧騫字長眞少有志氣嘗推誠行己能以正直全於多難之時刺史譙王承命爲主簿承爲魏乂所敗乂誅承黨求騫甚急鄉人皆爲之懼騫笑曰欲用我耳彼新得州是其求賢時也乃詣乂乂喜曰君所謂古之解揚也以爲別駕騫有節操識量宏遠與人交久益敬太守庾亮稱爲長者歷武陵始興

太守遷大司馬卒於官

鄧粲騫子少以高潔著名與南陽劉麟之南郡劉尚公友善並不應州郡辟命荊州刺史桓冲卑詞厚禮請粲爲別駕粲嘉其好賢乃起應召麟之尚公謂之曰卿道廣學深眾所推懷忽然改節誠失所望粲笑荅曰足下可謂有志於隱而未知隱者隱之爲道朝亦可隱市亦可隱隱初在我不在於物尚公等無以難之後患足疾不能朝拜求去職不聽令臥視事乃以疾篤請乞骸骨許之粲以父騫有忠信言而世無知者乃著元明紀十篇注老子並行於世

續志論曰騫辭譙王承之命而赴甘卓之辟揚揚自喜忠義之氣安在粲不能固介石之操而徒飾小辨忤良友又何足貴哉昔袁淑集古來隱士之無實者而孔稚圭有北山之移粲若見之能無汗顏

王毅廣州刺史甚得南越民心子矩機

王矩字令式美咨容每出觀者盈路初爲南平太守以討陳恢功遷廣州刺史將赴任見一人持奏謁矩自云京兆杜靈之矩問何時發京兆云辰發矩曰京兆去此數千里那得爾爾曰我乃天上京兆去此萬里被使召卿爲主簿言畢忽不見矩至州月餘卒

宋

徐偉事母至孝母死毀瘠嘔血服除舉孝廉不就去之陸渾縣解落山中教授生徒依以居者三百餘人歲荒貧不舉子

者偉資給之人感其惠所舉子皆以徐名偉有八子均名士時號徐氏八龍又偉有奴背叛所識欲令售之偉曰不可奴往必復逃豈可虛受其直乎廉正如此長沙忠義祠雍正三年奉

敕鐫姓名於碑曰宋孝子徐偉

按舊志載徐偉六朝宋時人府志載南北朝徐偉潭州臨湘人考六朝宋時臨湘縣屬長沙郡則臨湘固長沙之舊號也通志據六朝宋書列傳載徐偉潭州人編入長沙是矣又據一統志載徐偉臨湘人復編入岳州趙宋時人物志其事實相同兩志互載不惟複出且誤編也今正之

南齊

長沙縣志

卷之二十三

人物一

七

孫普濟居父喪未葬鄰火將及舍普濟號慟伏棺上以身蔽火鄰人往救焚炙悶絕累日乃蘇

國初雍正三年奉

敕鐫忠義祠碑曰南齊孝子孫普濟

陳

歐陽景達頷之祖也仕梁爲長沙治中因家焉

歐陽僧寶頷之父也仕爲屯騎校尉

歐陽頷景達孫僧寶子也爲郡豪族頷少質直以言行著稱父喪哀毀家產讓諸兄廬麓山寺傍專精習業博通經史梁時從將軍蘭欽征討苗獠以功進直閣將軍欽卒湘衡五十崙不賓頷爲都督悉討平之欽弟裕攻始興招頷不從遂攻

頡陳武帝入援敗裕梁元帝封頡新豐縣伯徧問朝宰各舉所知羣臣未對帝曰吾已得一人矣歐陽頡甚公正有匡濟才恐蕭廣州不肯致之乃授頡武昌刺史欲令出鎮時蕭勃在廣州果畱不遣及勃度嶺以頡爲將軍都督後隨勃出南康周文育破擒之送於武帝得釋封始興廣東南雄府屬縣侯後爲安南將軍懾伏交廣十九州陳武帝進征南將軍天嘉四年卒贈司空諡曰穆子紇亦以武略著

按徐陵撰歐陽頡德政碑云僧釋慧羨等來朝絳闕備啟丹誠乞於大路康莊式刊豐碑庶樊卿寶鼎復述台司之功羊叟高碑更啟征南之德於是頡開黃素爰登紫泥鑿此誠祈皆如所奏據此則歐陽頡之德政徐陵豈未之前

長沙縣志

卷之二十三

人物一

八

聞邪抑梁陳時崇重佛教清議操自緇流邪殊不可解附識之

歐陽盛頡弟仕至交州刺史

歐陽遂頡弟仕至衡州刺史

唐

歐陽詢字信本頡之孫敏悟絕人讀書輒數行同盡博貫經史仕隋爲太常博士唐高祖微時數與游旣卽位累擢給事中詢倣王羲之書險勁過之尺牘所傳人以爲法高麗常遣使求之神堯曰不意詢之書名遠播外國貞觀初歷太子率更令宏文館學士封渤海男年八十五卒世說載詢行見古碑是索靖所書駐馬觀之良久乃去數百步復還下馬停立

疲倦則布毯坐觀三日然後去祀鄉賢

歐陽通詢子少孤母徐教以父書通刻意臨倣與父齊名號大小歐陽體儀鳳中爲中書舍人母喪詔奪哀通每徒跣入朝夜直藉橐寢年饑未克葬居廬四年不釋服冬月家人以氈絮潛置蓆下覺卽撤去累遷殿中監封渤海子天授初轉司理卿判納言事會張嘉福請以武承嗣爲太子通與岑長倩固爭忤諸武意下獄死神龍初追復官爵

國朝雍正三年奉

敕鐫姓名於忠義祠碑曰唐忠臣司理卿歐陽通

劉蛻字復愚唐懿宗咸通閒進士爲左拾遺時帝以內臣吳德應爲巡繹使臺諫上言故事御史巡繹不應忽以內臣代

長沙縣志

卷之二十三

人物一

九

之上諭敕命已行不可復改蛻尙言自古明君所尙者從諫如流豈有已行而不改且敕自陛下出之自陛下改之何爲不可勿聽帝又欲以令狐滈爲蛻同官蛻上言滈無家法布衣竊卿相權滈父絢方守淮上奏自治帝貶蛻爲山陽令滈亦引避帝乃改滈爲詹事司直蛻寓居潼川垂老瘞其文於南山兜率寺刻石自爲銘序之初荊州每歲解送舉人多不第號曰天荒解及蛻以荆解及第號爲破天荒時崔魏公作鎮以破天荒錢七十萬資蛻蛻謝略曰三十年來自是人廢一千里外豈曰天荒祀鄉賢

胡曾長沙貢士唐僖宗乾符中任甯遠縣事請於朝復立舜廟於玉瑄巖下有敕建舜廟碑記

按舊志遺今依甯遠縣補入

王璘詞學富贍應日試萬言科請十書吏各給筆札口占授之十吏手不停札首題黃河賦三千字復爲烏散餘花落詩二十首未停午已就七千言時路巖當軸召之璘請候帝巖怒亟罷萬言科璘杖策歸放懷詩酒與李羣玉相遇嶽麓羣玉意甚輕之因與聯句璘占應敏捷至芍藥花開菩薩面椶櫚葉散夜叉頭羣玉不覺屈服

湘中老人逸其姓氏洞庭客呂雲卿遇於君山索酒數行老人歌曰湘中老人譚黃老手披紫藟坐碧草春來不知湘水深日暮忘卻巴陵道東坡云唐末有人誦此詩真能遁世如謫仙者流也

長沙縣志

卷之二十三

人物一

十

戴簡以文行屢爲連帥所賓禮貢之澤宮志不願仕好孔氏書旁及老莊有堂近東城而池環之九里游覽之勝爲最柳宗元作記

易元吉善畫於舍後開圃鑿渠雜以亂石叢篁梅菊葭葦羅列其中馴養水禽山獸伺其動靜以資畫思故寫動植諸物皆如生尤喜畫獐猿評者謂徐熙以後一人

後五代

廖匡圖字贊禹文學博瞻爲時所稱時馬希範襲爵楚王好學善詩賦匡圖與徐仲雅李宏皋等俱辟幕下奏天策府學士以文藻知名有廖氏家集一卷

匡唐書光

廖偃匡圖子

匡圖十八學士之首也

周廣順元年楚王殷子希萼爲馬

步徐威所逼幽衡山時彭師暲居衡偃與暲父匡凝謀曰吾家世受馬氏恩盍相與輔之率鄉兵與暲共立萼爲衡山王以縣爲行府斷江干編竹爲戰艦以暲爲節度使募眾萬餘人遣判官劉虛已求援於南唐主南唐嘉師暲與偃之忠以暲爲殿直都虞候偃爲左殿直軍使兼萊州刺史丙辰復以偃爲道州刺史後死於王逵之亂

徐仲雅關中人徙居長沙年十八湖南馬希範辟爲學士時造九龍殿制度奢僭重斂供役仲雅引典故以規正之不從邊鎬入長沙仲雅辭去後周行逢入長沙慕其名欲用爲節度兩以疾辭行逢迫脇固召之而授文牒辭不取行逢怒放之邵州竟不爲屈

長沙縣志

卷之二十三

人物一

十一

續志論曰舊志不入忠孝而列之方正竊嘗疑之及讀天策府學士諸詞大抵絺章繪彩嘯月吟風其與臨風結綺玉樹後庭諸什何異獨仲雅雅意匡主不忘瑱規吟詠數篇於興衰存沒之意畱連慨歎不啻三致意焉有風人之遺卒之邊來馬去麥秀之憾方深松柏之操不改彼視周行逢么麼眈氓辟之牒之放之不能屈五代雲擾朝如逆旅君如傳舍臣如賈販而偏邦一隅乃有此人碩果不食人心僅存而長樂老方歷序累朝榮樂自謂癡頑老子能無聞風媿死

宋

王世則係太平興國八年進士第一雍熙中爲右正言與左

正言尹黃裳馮拯伏闕請立元僖爲儲嗣太宗怒黜知蒙州至道閒爲永州太守

孫景修少孤母熊氏固知書教景修卒業咸平進士仕至太常少卿比老追念母德撰賢母錄又集古今家誡四十九人蘇頴濱序其集曰師之於弟子爲之規矩以授賢者引之不賢者不强也君之於臣爲之號令以戒能者予之不能者不取也父之於子則不然子雖不肖豈有棄子哉是以盡其心以告之無憾而後止今是書自周公以至於今父誡四十五母誡四公又將廣之未止也

狄宗謙桂陽令狄棐曾祖

狄文蔚清湘令狄棐之祖也

長沙縣志

卷之二十三

人物一

十二

狄棐少隨父官徐州以文謁路振振器重之妻以女舉進士知廣州代還不以海物爲累人稱其廉官太常少卿遷龍圖閣學士歷知河南府有中貴過郡將援棐見上棐拒之退而語所親曰吾湘中一寒士今官侍從可垂老自污邪六子惟遵度工詩文最知名王荆公志其墓

狄栗字孟莊棐弟穀城令民多豪猾以法繩之歲饑米貴發常平倉以賑有司劾其專擅上聞而原之修聖廟置禮器歐陽修稱爲廉吏志其墓

狄遵度字元規棐長子以父任爲襄縣主簿甫數月棄去撰春秋雜說擬作皇太子冊除侍御史製裴晉公傳人多稱之有集十二卷著石室鑿二江賦白雲秋月諸篇

按遜齋閒覽云狄遵度幼而聰慧弱冠爲文詞氣豪邁有韓柳風其爲詩以子美爲法旣而友人有往湘中者乃爲文使之耒陽弔子美之墳數日忽夢子美與之反覆諷誦平生所爲詩十餘篇皆世所未見者及覺恍惚纔記十餘字遂自綴足成章云佳城鬱鬱頽寒煙孤雛乳獸號芳阡夜臨北斗寒掛枕木落霜拱雁連天浮雲西去半落日行客東逝兩長川乾坤未死吾尙在肯與螻蛄論大年歲餘遵度卒時年十六東坡集中亦嘗載此事

狄遵禮字子安棐次子試秘書省知蘄縣有能聲陟駕部郎黃庭堅志其墓謂睦家甚雍以仁爲寶子七人多有顯者

狄明遠朝請大夫狄明復河南府通判狄明忠承務郎皆狄
長沙縣志

卷之二十三 人物一

十三

遵禮子

狄遵誼遵微并狄栗子皆舉進士

畢田博學能文工於詩眞宗朝以吏部兼侍講居經筵值天寒奏蠲臨湘七都科調里人德之祀鄉賢

譚世勣字彥成舉進士教授郴州時王氏學盛行勣雅不喜或問之曰說多屢變非不易之論置其書不觀又中詞學兼茂科除秘書省正字時蔡京子攸領書局同舍郎多翕附以取貴仕世勣獨坐直廬繙書竟日梁師成之客與爲鄰居數致師成願交意謝不荅在館六年不遷京罷用久次爲司門員外郎又三年遷吏部京復相嫌不附己罷黜太平宮久之復遷吏部倖臣妄以恩澤任子持不與吏白有某例世勣曰

豈當以暫例破成法而取中旨行之乎遷少府監擢中書舍人以謹命令惜名器廣言路吝賜與正上供省浮費六事言於上又爲當事所嫉以徽猷閣待制知婺州未行復畱之徽宗禪位林靈素幸且還使與李熙靖副執政奉迎同主管龍德宮請辨正宣仁國史之謗述欽聖遺旨以復瑤華位號大亨神祖仍用富弼侑食釋奠先聖不當以王安石配後皆施行秋七月彗出東方大臣或謂四夷滅亡之兆世勣面奏垂象可畏當修德以應天不宜惑諛說進給事兼侍讀內史喧爭殿門詔以贖論世勣駁其不恭因言童貫小惡不懲馴致大患疏入同類側目何棗建分外郡爲四道置都總管事得顓決世勣言裂天下以付四人而王畿所制者纔十六縣獨

無尾大不掉之慮乎棗不樂改禮部侍郎金騎南下世勣言守邊爲上策守河則京畿自固中策也巡幸江南會東南兵以扞敵下策也金人旣渡河又請遣大將秦元以所部京畿保甲分護國門使兵勢聯屬首尾相援孫傅深然之又格於棗議再扈車駕至金帥帳下又以十害說其用事者言講解之利詞意忠激金人聳聽張邦昌僭位令與李熙靖同直學士院皆稱疾不起以憂卒年五十四建炎初褒其守節贈端明殿學士所著有師陶集祀鄉賢

按宋史載譚世勣長沙人舊志遺之今依宋史補入

譚申政和閒進士張邦昌辟爲屯田郎中不拜紹興四年知筠州禱旱於郊頃之大雨後守瑞州歲饑民不能輸申請罷

徵監司責益急申堅持之坐降秩遂致仕歸老於昭潭民感其仁爲立祠曰古潭

按譚申府志載茶陵人通志選舉載譚申湘潭人而人物志載長沙人前後互異考楚紀譚申長沙人故舊志本之今仍之

雷深淳熙九年知宜章建學宮給廩課士士多賴其啟迪歷官吏部郎祀名宦

按雷深入祀名宦通志本長沙縣志載入人物王志李志遺之今依通志補入

李耕聚居累至七百餘口眞宗時旌表蠲其課調

瞿景鴻五世同居詔旌其門

長沙縣志

卷之二十三

人物一

十五

胥偃字安道舉進士授大里評事屢遷學士擢知開封沂州地震偃言陽不勝陰之象元昊叛請遣使問罪然後加兵八月霜雪暴至偃推洪範寒若之咎請釋坐繫者從末減又辨坐死者數人未仕時有良田數十頃旣貴悉予族人見歐陽修愛其文以女妻之

胥元衡偃子有學行累官尙書都官員外居官有能名子茂謀俱早卒偃妻直史館刁約之妹與元衡妻韓茂謀妻謝三世寡居閨門有法

孫方武州學正金人入城方武率居民連日巷戰金人四面縱火人皆怵竄惟武挺身罵賊死之祀於學雍正三年鐫碑忠義祠曰宋忠臣州學正孫方武

劉琦生二歲母劉氏陷於兵琦後每思母歎曰人皆有母我獨無至涕下及冠請於父往求母遍歷河南北淮東西得於貴池迎以歸養十五年父沒又三年母沒終喪蔬食有司以聞表其門曰孝義

按劉琦舊志載宋時人府志載元時人元時臨湘不屬長沙故刪之通志編入元時岳州臨湘人且誤載劉琦爲張琦查長沙忠義祠碑內鐫姓名載宋孝義劉琦列入祀典久矣故仍舊志編入

王玠字介玉蘄黃鎮撫使孔彥舟叛高宗紹興時玠開陳百端不聽大罵曰逆賊恨不磔汝萬段舟怒並玠家屬沈之龍眼磯

按舊志載王玠長沙人通志府志俱載善化人查長沙忠

長沙縣志

卷之二十三

人物一

十六

義祠碑內載宋忠臣王玠故仍錄之

鄭應龍字少慈慶元中登第後試律中首選調潭州理掾麗狴犴者以理開諭皆得其情有兵士盜帥金下獄株連數人皆坐流應龍力爭曰若使罪及無辜有去官而已帥歎曰其人若不勝衣乃能執法如此

畢贊仕郡爲引贊吏性至孝父母皆年八十餘轉運使表其事詔贊解職終養

張唐以朝奉郎與趙璠王夢應等同起兵恢復兵敗被執元行省參政崔斌欲降之唐罵曰紹興至今五十年乃我祖魏公收拾撐持今日若降何以見魏公於地下遂遇害

尹穀字務實號耕叟性剛直莊厲登進士調常德推官知崇

陽所至廉正有聲擢守衡州需次於家潭城受兵帥臣李芾聘爲參謀共畫策備禦時城中壯士皆入衛臨安芾糾率民丁獎勵以義人殊死戰三月城不下敵軍斷絕險要援兵不至穀知城危與妻子訣曰吾以寒儒受國恩典方州誼不可屈若輩必當從吾死耳召弟岳秀使出以存尹氏祀秀泣而許之招鄉人爲二子行冠禮鄉人曰此何時行此迂闊事穀曰正欲令兒曹冠帶見先人於地下耳已乃積薪扃戶朝服望闕拜先取歷官告身焚之赴火自焚鄰家救之火熾不可前於烈焰中遙見穀正冠端笏危坐一門少長皆死芾聞命酒酌穀曰務實眞男子也先我就義矣州學嶽麓精舍三學生數百人往哭之城破多感激死義者祀鄉賢

長沙縣志

卷之二十三

人物一

十七

按尹穀元史作長沙人通志載茶陵人府志載善化人攷楚紀云尹穀字耕叟以元兵死難載在元史雍正三年忠義祠碑鐫曰宋忠臣衡州守尹穀今仍載入鄉賢亦感其節重其人也

元

翊刺氏母病割股掾之稱其地曰孝順坊

孝順坊屬善化治

按元史載潭州萬戶那刺瓊子李家奴九歲母病醫言不可治李家奴乃割股肉以進病乃愈事與翊刺氏相類今附記之

許有壬熙載子能詩少有聲譽由辟薦仕至中書省丞於榔梨市建東岡書院以居學者

按府志據元史許熙載傳湯陰人仕長沙編入名宦通志
舊志均載有壬長沙人編入人物今仍之

張圖南字息堂以文章爲一時推許與馮海粟齊名徵辟任
教諭

李叔魯湖南寇起推魯千夫長率兵千餘爲保障尋衡山茶
陵寇至魯力不支遂死於戰

鄭菊隱其先閩人移家長沙居東湖年七十餘幽貞自守爲
鄉人推重元統閒聞於朝再聘不赴賜諡曰安節

劉永悅號雪峯仕元爲南臺御史峭直著聞

劉顯然號秀峯明洪武初知縣王銓踵門三起不出隱包黃
崗教授生徒

長沙縣志

卷之二十三

人物一

十八

明

王凱洪武三年授長沙衛鎮撫永樂十一年因荒出穀一千
一百二十石賑濟饑民永樂十五年欽賜王凱尙義之門北
門城內建尙義坊

王偉號桐山攸縣籍世居長邑隨父參政靈成宣府年十四
宣德北巡獻安邊頌命補保安州學生正統丙辰進士授翰
林改戶部主事值邊警偉糾集士民守廣平遷兵部職方郎
時文移填委偉援筆立就少保于謙專任之擢兵部右侍郎
視邊密具方略有小田兒本中國人陰爲邊患偉設計誘至
陽和城伏勇士於道殺之自是疆場無擾天順中爲石亨嗾
歸復召原官陳二事上嘉納之初亨誣謙與偉黨逆榜行天

下至是特追其榜五年以病歸至濟甯卒賜祭葬宅第於郡城北廖道南太史贊曰擘邊干紀六飛蒙塵龍沙颺起翰海波騰矯矯肅愍協心士英運籌出奇宗社底甯祀鄉賢乾隆四年後裔王羲齡請

帑銀一百四十三兩九錢七分建祠專祀

張榮政正統六年辛酉奉例出穀一千一百石解京賑邊頒賜聖旨金匾樹以義民牌坊降敕曰敕湖廣長沙府長沙縣民張榮政國家施仁養民爲首爾能出穀一千一百石賑濟有司以聞朕用嘉之今特賜敕獎譽勞以羊酒旌爲義民仍免本戶雜派差役三年當允蹈忠厚表勵鄉俗用副朝廷褒嘉之意欽此

長沙縣志

卷之二十三

人物一

十九

徐騰芳歷任肇慶知府以公恕稱致政歸結湘山十老會歲時宴會望比耆英祀鄉賢

陳兼善積學能文行尤謹厚授經三十年成就多佳士以歲薦令昌黎有清如水明如鏡之歌因忤上落職歸督課子孫手不釋卷壽六旬易簀時自著小贊以志生平有清白傳家十一世詩禮垂訓三百年之句云

羅鑒號湘川茶陵人世居長邑成化戊戌進士授南京刑科給事中轉戶科宏治初上疏言三事曰隆輔養保初政廣積貯上嘉納之擢廣東左參議歷四川布政所至均賦役練戎政撫孤老不務赫赫名遷右副都御史督蘇松糧儲劉瑾索賂不應遂落職瑾敗起巡撫尋致政歸築願樂亭作左右銘

以自警年九十猶能燈下細書與人處雖童賤必禮下之有古長者風祀鄉賢

楊顯泰府志作恭居青山生平好善樂施拯危周急未嘗一入公

門事繼母鍾克盡孝道與從弟顯洪合爨友愛篤至有親屬被劫犯鋒往救賊詢其名亦未加害人咸稱爲楊佛子教子發科子因終養不仕雍正三年忠義祠碑鐫曰明端義楊顯泰

瞿多助字道甫衛人府增生南昌熊石門督學楚中深器重之後承襲指揮以儒雅稱擢安慶參戎江西都使司石門鄉居延譽兩臺以儒將目之歸喜讀書購聚甚富自號識丁居士云

長沙縣志

卷之二十三

人物一

二十

彭澤號幸菴繫籍蘭州偉貌軒軼篤學好古登成化進士授工部主事轉刑部郎知徽州府徽士多訟悉懲之法時進俊髦講解經義故多文學士歷都御史討平河南流賊劉三趙風子之亂進兵部尙書加太子太保致仕囊橐蕭然

按史載幸菴身長八尺腰帶十二圍顧盼炯如平居鮮笑容雖偶語叱咤聲若詈者性疾惡舉朝憚之幸菴本長沙人繫籍蘭州通志府志誤載湘陰人

黃寶字廷用成化進士主吏部文選事懸鑑勵操風節凜然有黃寶不愛寶之謠遷太常卿修舉禮樂擢都御史巡撫陝西潼關近邊城堡多圯廢羽檄旁午倉卒莫備寶肅紀律增壁壘豫餽餉達烽燧息災沴屏黠猾復恐邊外互相援應建

議斷其右臂挖其中吭犄角之秦地以甯逆瑾柄國罷歸瑾
敗復起巡撫雲南不踰月以疾卒著有東岡集賜祭葬北門
大街建都憲坊潮宗門內建銓衡坊祀鄉賢

按黃寶善化志通志載善化人舊志府志載長沙人查黃
寶撰壽星觀碑記府城隍廟鐘銘皆自署曰長沙黃寶且
其墓在長沙智度山當是世居長沙由長沙學出身者故
仍舊志載入

楊志學字遜夫繫籍彭城衛登宏治癸丑進士任主事歷官
都御史巡撫大同邊卒桀驁屢戕主帥驚疑弗靖志學感以
至誠軍士感服召擢戶部侍郎進尙書扈世廟巡幸興都

舊爲
興都

督餉免租民蒙其澤卒贈太子太保諡康惠祀鄉賢子

長沙縣志

卷之二十三

人物一

二十一

九人成進士者三鄉貢者六其自北都遷居長邑則方伯皋
村公諱守約者當時有大賢之號故長邑編列圖名因其所
居鄉稱大賢都建父子尙書坊

楊守謙字允亨志學子嘉靖己丑進士授屯田主事改職方
郎出爲陝西副使擢僉都御史巡撫山西上言偏頭老營保
二所餘地千九百餘頃請興舉營田薦副使張鎬爲提調牛
種取給本土報可俄移撫延綏請久任鎬終其事二年營田
大興計秋獲可當帑銀十萬邊關穀價減十五進副都御史
巡撫保定兼督紫荆諸關庚戌都城被困謙不候調發卽擁
兵至城下橫絕敵營京都遂定上大悅進兵部侍郎責戰益
急謙策邊眾十數萬分散四塞我兵寡不敵眾援兵未至宜

堅壁以待候兵合卽出奇擊之乃策未及行中貴嫉其功謗以爲逗畱激上怒詔獄論死時論惜之謙以學行稱守官廉介聞變赴敵蹈死不悔隆慶改元科道交章白其冤加贈尙書諡恪愍祀鄉賢子汝燦舉人弟守約守魯皆方伯子姪三十餘其尤著者時稱十才子德潤門內建兄弟方伯坊楊守魯宜興流寓志字允得號魏村守謙弟少聰穎具文武才中春秋兩魁歷官陝西右布政壯歲乞休愛宜興山水佳秀買田居之旣而念邱墓不可遠離仍返故居性淡泊寡嗜欲家居布衣蔬食徒步往來人亦忘其爲貴介也嘗與學者講春秋書義深得聖經之旨學者宗之

夏景和字時雍成化丁未進士拜監察御史歷陟都御史

長沙縣志

卷之二十三

人物一

二十二

陳德清字漣漪明永樂閒由廩生以薦辟爲河朔令陞南京戶曹轉雷州別駕署府事雷民習澆不勤耕作清履阡陌勤督率比及三年民有儲積知自愛所在勞惠交著七十致仕歸建祠敬宗延師課族當事贈以聯曰黃堂坐鎮安黎庶白首歸家教子孫

熊宇號軫峯藩府儀衛人正德丁丑進士授行人歷陞松江守遇直指鄰郡約字不當參宇獨執約被斥歸手不釋卷素工文翰墨刻十三經篆離騷里居見童幼必以貌求書者雖微賤必應之

龍光衛人號斗垣幼穎敏有大志甫十二以詩感其父就儒力學嘉靖壬戌舉進士

原名化御筆改光字

任蘇州推官以志行高等

晉吏科歷掌科事多所建白直聲聞於朝野轉山東方伯以疾卒驛步門內建都諫坊

蕭禹臣嘉靖丁未進士令遂甯作息訟辨民俗還醇轉繕部員外郎修皇殿大工有勤勞世宗每膳必徹以賜論不必謝恩可謂榮矣祀鄉賢

魏煥字原德衛人嘉靖己丑進士司理嘉興有青天之謠陞兵部主事作九邊圖考試選條例進員外郎作皇明拱衛錄任四川僉憲化宣慰教子之頑平土官奏記之獄獯苗咸服以疾歸一日卒煥貞惠簡溫不以才智自見明悉當時之務預見成敗毅然身任之遺有宗會堂圖說父棠歲貢令彭水子時用選貢令大甯三世仕蜀俱有賢聲祀鄉賢

長沙縣志

卷之二十三

人物一

二十三

魏時用煥子嘉靖中由選貢授四川夔州府大甯令慈愛潔清士民德之歸家足蹟不履公庭賑貧恤族註父煥九邊圖攷恪遵家法閨門整肅閭里化之祀鄉賢

王銓少負才名嘉靖癸卯亞魁會試不第窮年授經課徒出其門者多雋士事母孝憐二弟幼悉以財產讓之二子亦克承先志

胡用中長沙衛指揮弱冠襲任以謹飭當上意歷陞守備都闔約己輯眾屢著勳猷擢廣梧參戎致仕歸明經庭訓折節搢紳有廉寇之風孫廣生襲職萬歷閒歷雷廉參戎儒雅善書不愧先世云

陳時中號白石博學宏才襟懷磊落常以友天下士爲快嘉

靖閒創環中書院集四方賢士肄業其中由成均丞吉水卑而能廉嘗自本鄉運米建尊經閣羅念庵師事之著有記棄官居鄉清介族有析產者以千金遺之卻弗受上於縣創水渡石橋麻林壩民利賴之

楊廷相世居青山號青山攻苦力學博通經史精天文地理性命元秘之旨中嘉靖壬子鄉試歷上春官不第遂結廬晦迹惟以宜家訓俗與人相勸勉足不履市廛有諮訪者無貴賤徒步一晤卽止時太守吳道行懇修府志隨附補遺一冊所著有青山集匿不傳年八十九偶微行遇一人攜談數十里許入山徑步履如飛家人追之促歸自是靜息踰年忽一日早起坐中堂命家人具觴羅拜作偈云吾年八十有九萬長沙縣志

卷之二十三

人物一

二十四

事順天安守雖然博一科名慚負君親師友作善未必克終爲惡自知罕有今朝返彼太虛清風明月題未畢擲筆而逝祀鄉賢

瞿繼祖號涵虛衛人少負才名應襲萬戶不就潛心經史中嘉靖甲午鄉魁卒業國學兩中南北監元九試禮闈不偶選永州尹不赴杜門謝客手不釋卷簞瓢自適一介不苟取匾其室曰心迹雙清壽七十九自撰志銘並逸民傳

黃恩衛後所千戶性真誠與兵士同甘苦殫力任事奉調征粵西徭賊有功特授世襲指揮僉事歸視衛篆卻暮夜金恬於勢利未衰告休課訓子孫以子翼貴封參政忠厚之風聞於鄉閭

陳壽麓端方廉潔隆慶三年以恩選仕蘭陽丞有冰檠聲工詩賦爲同寅所忌挂冠歸著春秋懸旨左傳旁訓唐詩玉林聽雨堂選頤季草家禮簡要諸集當事恆造廬諮焉結耆英會與鄉達十老賦詩飲酒訓子若孫咸蜚聲藝林年八十舉鄉飲大賓至九十燈下猶作小楷杖履蹠蹠賦詩自壽越兩月整冠危坐而逝如委蛻然

鄧巍嘉靖辛丑進士令溧水晉御史疏劾權貴救忠輔忤旨受廷杖直聲凜然奉命巡邊單騎行營登城禦寇擬異擢竟爲權貴所抑出守保定補鳳翔歲饑賑濟全活者數萬致政家居三十五年不輕謁公庭舉大賓八十五卒

按通志府志俱載瀏陽人舊志載瀏陽籍世居長沙由府
長沙縣志 卷之二十三 人物一 二十五
學出身嘉靖丁酉舉人辛丑進士今仍之

李棠號石塘嘉靖進士授禮部主事請告二十年起官歷僉都御史吏部侍郎上安邊六策王崇古以俺答就撫條封貢八事廷議紛紜獨棠極言當許帝從之巡撫南贛雅志澄清多所裁正南贛立祠特祀討平韶州山賊轉南京兵部侍郎改吏部右侍郎卽致政或諷其待遷冢宰公正色拒之將一年卒卒時有星隕於其門公居鄉清介嚴明不營生產不蓄財帛不收僕從布衣徒步往來遊覽絕迹公庭惟里族有被害者必立白之當事侃直不少徇人咸呼爲李石頭天啟初追諡恭懿祀鄉賢德潤門內建天官少宰坊

朱鸞長沙衛人舉於鄉任鳳翔同知畫策弭寶雞劇盜民得

安業發隱奸辨秦藩之誣擢戶部員外郎會計有方聞親訃卽行家居絕迹公門孝行清望推重一時祀鄉賢

譚敬承長沙衛人廕襲丰標勁挺幼習經書長學劍術工騎射以武進士授衛使掌篆務陞守備轉山東僉書奉旨修古北口邊城欽賜銀二十兩旋擢鄖陽參戎在任七年地方整飭陞貴州總戎播有逆萌敬承出征大鉞方張播畏威歸附辛卯歸田丙申卒敬承雖武科能詩工書法著按劍集行邊艸清美堂集蓋儒將而以能名者也北門大街建元戎督府坊

趙恕翁邑庠生負奇才闡卷業爲郡司李識拔以表句有礙置副車翁歸卽取巾衫焚之絕口不談舉子業莊學士天合

長沙縣志

卷之二十三

人物一

二十六

幼貧翁物色塵埃妻以女晚年放縱不羈一切文章科第俱不介意嘗獨行郊外與行乞款譚樂與編戶之耿介者游其弟願行結茅山寺傍客至談世外事則焚香煮茗畱坐終日兄弟皆高士也

莊天合字德荃號冲虛衛人清標秀質年十五爲督學陳霽巖所拔萬歷戊子以壁經魁楚己丑聯捷選詞林壬辰卽以編修同焦公竑分考會闈侍經筵敷對朗徹晉右中允制曰朕審觀天序肇建國貞咨汝前後左右之人必皆方正博聞之士委之旣重恩亦宜優爾右春坊右中允兼翰林院編修莊天合秀韻消煩昂姿拔俗自拾崑峩之第遂居翰墨之林學術最端文章獨貴絲綸視草詞追兩漢之醇杞梓題材士

盡三江之彥俄正前星之位特膺甲日之求進秩青宮橫經
丹幄論思預其祕密調護參其華嚴積有賢勞可忘褒賚茲
特以覃恩授爾階儒林郎爾入奉鼇山之直出參鶴禁之遊
乃儒者之極榮豈他人之可望勉思爾職在陳善以閉邪簡
在帝心將投艱而任大欽哉時光宗在東宮每嘉賚焉庚子
主試南都甲辰再分考會闈沈酣經史吐納風騷莅官清介
方嚴負公輔望家居事封翁侍繼母愛諸弟克敦孝友虛懷
好善不營世利累官少詹丁父艱歸卒祀鄉賢子以臨奏請
卹典贈禮部右侍郎賜祭葬新開門內建玉堂清要坊北門
大街建宗伯師臣坊

長沙縣志

卷之二十三

人物一

二十七

姿玉質養育薰陶在史館二十餘年多所造就如左光斗
繆昌期之忠節張以誠李允昌梅之煥之才名內閣則有
錢龍錫吳宗達卿長則有葉燦錢春督學則有趙之翰竇
子偁馬人龍其他立德樹勛者不可勝載皆公門下士也
公之祀鄉賢也在萬歷甲寅其贈官也在天啟壬戌贈官
者朝廷之公典祀鄉賢者閭里之公評贈官後而鄉賢先
志公也故紀年以備考云

莊以臨字近之天合子風神秀異才性高遠寡交淡營日擁
遺書流覽獨酌每罄一斗屢月不出衣冠樸素試輒冠軍天
啟中年踰四十以廕授中書舍人兩奉差賚餉犒邊值璫焰
方熾竭貲補賠卒於家世服其端雅云祀鄉賢

歐學

府志作陽

啟字省微號古愚家貧好學爲諸生時有目空一世之意以小誤被黜賴同學莊冲虛在翰苑以其事白之學使者得雪中萬歷丁酉舉人戊戌進士授河南中牟知縣時值內臣專擅啟不爲禮璫廷辱丞尉以脅之士民憤璫不法毆撻幾死啟坐累幾危當事持之得無恙逾年卒於任年四十未竟厥志云

黃翼字星池恩子以進士起家縣令繼任知府陞四川左參政其清如水事有利民者毅然行之不畏強禦後致政歸二十餘年家無餘積常稱貸以給饗殮意自得也萬歷中與湘潭周方伯同修府志

甯若愚號春葵爲諸生時苦志下帷言動不苟以恩選任雲

長沙縣志

卷之二十三

人物一

二十八

南澂江通判陞雲龍知州所至愛民如子杜絕請援士民戴若慈母立學宮勤考課成都太守吳宏業荆南兵憲于發藻皆出其門歸家閉門訓課當道求一見不可得太守關守箴節推林雨化登門拜訪屢舉大賓道貌岸然正氣懍懍見者起敬壽九十卒

王柱字廷宇爲諸生時受業者甚眾見寒儒則周卹之太守萬延之師席有同里牛姓被誣置重典柱代辨得釋逾月牛方知願以身供役不許由歲薦任德安教諭陞繁昌知縣居官六載矢志清廉禮士愛民省刑革耗有古循牧風水溢隄潰捐俸修築不憚勤勞民至今利之陞無爲州知州未赴任卒繁昌本縣及板子磯兩立生祠祀之

蔡之珍字席侯楊之麟字伯玉皆長邑知名士也同里同庠其學業高古品行超潔不談世事不入公庭以讀書明理交相勸勉里人敬憚之蔡中天啟辛酉副榜准貢四十五卒楊中萬歷壬子崇禎庚午兩科副榜未及貢五十餘卒

王五常號兩松以增廣生入監任主簿字做趙孟頫畫做沈石田文徵明每字畫後必書長沙王五常萬歷閒巡按某徵字畫於長沙王王請兩松揮數幅以進直指酬以金幣笑而卻之

李日省號三吾爲諸生時攻苦杜門無書不究每試高等以泰昌恩選授福建建陽縣縣丞禮士愛民清介不苟未幾拂衣歸以德行重於鄉里

長沙縣志

卷之二十三

人物一

二十九

劉宏化衛人十歲失怙茹苦力學以進士兩令山西以循卓稱甫任刑科給事輒糾輔臣附權宦內臣僭批荅有直聲議移宮紅丸之案及奏蠲扣派積逋定邊計丰裁凜然典試山東擢吏科都給事值魏璫亂政王安楊漣後先罹禍熊廷弼論死宏化力爭之忌者坐受熊賄萬金寔不能措崇禎御極特昭雪豁免起兵科都給事陟光祿卿轉南大理以疾歸逝宏化孤高自愛不營田宅不輕取予僕從僅數人軫念桑梓貧苦減郡賦五千餘金祀鄉賢

見府志

按劉宏化舊志府志俱載長沙衛人惟通志載攸縣人今附識之

左英字小瑜爲諸生時修潔自好擇人而友選言而發由天

啟甲子舉人署武陵教諭陞南直和州守時和州初被賊陷
殺戮焚燬僅存子遺英苦心撫輯刑措不用民有更生之慶
歷任八年家尸祝之陞揚州郡丞致政因亂僑寓和州
王國賓字用之豐頤美髯善談論少時有聲庠序以天啟選
貢任浙江常山縣吏材敏給善營辦上臺器之三年之中署
四邑篆遇大獄大役咄嗟立辦暇則與文士盤桓詩酒以疾
卒於任常邑士民備舟送歸哭奠而去

周生文字西人武燦文字兼才胡夢宏字遠公勤學好問有
聲藝苑與李先登董良璵閻世臣江有溶等爲詩文唱和友
每試高等而甘貧樂善不改其素生文丙子同閻世臣舉於
鄉生文子于敬亦舉於鄉夢宏恩選惟燦文食餼本庠遇亂

長沙縣志

卷之二十三

人物一

三十

疾卒

廖臣號小塘居鄉任質守禮內外無閒言獨嚴於課子長子
國遴早歲舉於鄉又三年成進士司李維揚保定有聲臣兩
膺封誥仍甘布素遭世亂溷迹田野夫婦偕壽八十五臣屢
舉大賓人稱隱君子諸孫元章元愷元軾元度元儀克世其
家學云

廖國遴字孟符崇禎丁丑進士家世忠厚庭訓極嚴雖負曠
世才而抑心下學初任楊州司理時內臣楊顯名作威福國
遴抗不爲禮白按臣李糾其專擅之罪楊稍斂手己卯分校
南闈得士最盛調保定畿南初被蹂躪國遴恩威兼濟繕城
籌餉歲饑施粥以活餓者上廉知之擢戶科給事中入垣上

守邊諸策皆允行後同鄉熊開元廷劾宜興相某忌之謂熊
疏出其手中以他事下詔獄尋釋甲申歸里卒著作甚富皆
灰於兵火惟存獄中別魚山先生一詩爲合肥龔孝升先生
評次者錄入藝文

楊德遠字仲先恪愍公後真率和雅常結社城南肆力古學
凡天文地理卜筮諸書無不究心處朋友慷慨負意氣以舌
耕備甘旨事親其餘資弟妹婚嫁家徒壁立晨夕怡然十闈
不第崇禎末出貢所著有大中緯紀事續編史辨諸書

周識衛人由善化學貢博學沈潛文有心得被放後遂不出
蔣瞿二公建惜陰書院徵爲院長多士以師事之講學之外
毫無干預又入田百餘畝於書院以供饘粥絕嗣而終人咸

長沙縣志

卷之二十三

人物一

三十一

惜之

史記言號太初幼穎敏博文強記當事咸以國士目之問業
者屢常滿歷試不偶以明經薦後以子貴封兵科給事中孝
事祖父訓諸弟子姪黽勉文行親操丹鉛課校之不令就外
傅祖產自取薄瘠餘讓諸弟周族賑貧排難解紛晚年自號
太穆意在清隱寇薄郡城捐貲厲兵登埤守禦鄉鄰倚重屢
致賓飲祀鄉賢

蕭偉字豈凡初名宗暉繕部郎禹臣曾孫美風儀性勇敢竊
慕劉杜兩將軍爲人見國步日艱棄章句潛心武事中崇禎
己卯鄉試奉特恩欽授王會都司威德並著卓有古賢將風
時峒蠻爲寇單騎深入陷蠻仗節死之遠邇哀慕斂金助櫬

歸旋建祠祀焉時年三十壯懷未竟人多惜之姪鍵武生亦
以勇力著獻賊陷郡見執被殺

周繼聖字述之邑廩生幼穎悟八歲從師肄業石道憲署內
卽能以駢詞驚當事十四補弟子員築精室黑麋峯學益進
名益噪獻賊躡長沙羅知名士將污以僞職深匿不出賊執
其母妻聖至賊營請代己皆不屈死聖潛逃歸破產募死士
殺賊得仇人殲以祭母湖督何騰蛟上其事授儒學教諭聖
痛母死義妻死姑終身不仕著作甚富悉燬於兵存慘然錄
及七哀詩子孫昌熾食遺澤焉

王重冠字逸洲廬陵籍世居潮宗門內性孝友贖父所鬻宅
撫弟妹六人以次婚嫁添置產業分給諸昆教弟重奇重京

長沙縣志

卷之二十三

人物一

三十二

期以文學著家聲嘗自署一聯云求天地祐莫如積德要子
孫賢無過讀書後同里公舉善人邑侯李養裕嘗旌其廬曰
高行表俗

按府志舊志載明時人通志載 本朝今仍舊志

林朝憲字耀宇生平慷慨激烈尙義樂施崇禎末有巨寇聚
黨橫行朝憲捐金散粟練集義勇擒其渠魁郡縣錄功題授
遊擊癸未張獻忠攻陷郡城遣僞軍師劉秩輔卑詞誘致不
從築堡固圉與賊相持會甯南伯左良玉恢復鄉里獲全乙
酉李自成餘黨瀰漫鄂野將寇星沙朝憲扼守要害殺賊甚
眾督撫旌其門疏請除授總戎不就退居田里以周急賑饑
爲事有勇好義如此

余邦臣以諸生授職員外郎節概偉亮受吉藩知遇最厚明神宗三十九年均圖選紳士承差眾以霧陽一都八甲遞年差付邦臣是時民困於差邦臣卽堅任之歲括家貲供官府以紓民困後保任皇木商人徐律領庫金三千兩律捲而逃株連甚眾邦臣竭貲賠償不足又洗手變產事賴以寢眾賴以全長子化龍廩生於崇禎八年邑侯楊觀吉徵窮民逋負甚急化龍代輸通都逋金三百兩後以不從亂賊死次子猶龍識鑿洞微闖獻橫驅河朔卽先幾去省垣居第遯迹影珠山下終其身不入城府

陳世科崇禎癸未閒勇士素號鐵腳苗頗習武藝獻賊攻城執推官蔡道憲不屈死之科素爲蔡公所拔義不忍負自縊

長沙縣志

卷之二十三 人物一

三十三

於永豐倉又蔡公隸劉士鳳亦死之

國朝

周國寶字祥卿事父母以孝聞父病焚香默禱含淚侍湯藥不懈明末寇亂寶弟負母劉氏奔甯鄉寶侍父於家賊突至欲殺其父寶力護哀求賊怒斫其手終不忍去賊義捨之康熙丁未途中拾遺金五十兩坐待還之又嘗出金代人贖妻生平孝義類如此乾隆元年請

旌建坊

江有溶字谷尙幼穎異十六補諸生崇禎中選拔授司李未選獻賊亂絕意仕進授徒里中炊煙弗繼晏如也專意著述尤工於詩嘗言有明一代騷壇屢桃神光之間吾楚公安竟

陵相繼作而竟陵之聲尤傾天下最後虞山出而繩其弊於是又爭齟齬竟陵矣竟陵標新領異實發古人所未及今鳴鼓攻之者恐亦未足服其心也吾輩自顧何如乃拾人牙後以相輕詆乎其學務自得不隨聲軒輊如此有溶既不得志於時又連喪其子其顛沛流離之感窮老無依之態皆形於詩讀者傷其志焉邑故無志邑侯胡公屬而創之搜輯編摩遂爲成書今之踵事實資焉所著有勿躁齋集陶仲調先生序之稱其貌短小而才長性恬柔而文矯舉動愿謹而意思蕭邁云卒無子子其弟之子棠甲子補諸生

按江有溶崇禎八年拔選十五年順天鄉試副榜康熙元年前縣胡壯生聘修邑志舊志選舉繫有溶於前明而人

長沙縣志

卷之二十三

人物一

三十四

物列入

國朝今仍之

趙開心字靈伯號洞門生而偉岸性孝友家貧授經鄰邑奉甘旨崇禎甲戌進士初任武定知州後補趙州爲內監所糾旋得釋補永平司李監軍推陞兵部職方主事

國朝授陝西道御史知無不言擢都察院僉都御史旋晉左都御史扶進善類解推不吝於桑梓尤篤以直言被黜未幾復補左都御史屢復屢黜而直聲凜然

世祖升遐時歎曰趙某惜未大用康熙二年進工部尙書總督倉場倚任方殷遽以疾卒

御賜祭葬開心居官清白囊無餘貲在朝知故各致奠賻南撫周率

僚屬攸助乃克葬祀鄉賢

胡爾愷字石江年十九登天啟丁卯賢書益發憤下帷不以一第爲榮崇禎丁丑進士母憂服闋授南直太平府推官城垣卑陋南大司馬史可法兵科左懋第委任督修夙夜不遑期年告竣他如訪蕪關之蠹定徽州之變其餘事也壬午分考盧象觀等咸出其門宏光時馬阮當國拂衣而歸十餘年不以姓名通有司歲丁酉經略洪承疇特疏薦授吏科給事中旋晉吏部右侍郎轉禮部左侍郎屢陳國計民瘼病卒於京抱病時猶陳四事爲民請命俱報可公曰四事舉吾目瞑矣卒後貧無以殮同鄉趙洞門等賻金歸櫬爾愷生平居家孝友居鄉雍睦雖官職顯榮布衣蔬食淡如也

長沙縣志

卷之二十三

人物一

三十五

趙而忬字友沂洞門長子少負奇才讀書過目不忘善雅談髫年卽以試藝見知於高彙旃堵牧遊丙戌湖廣補鄉試登賢書後遊京師錢牧齋龔孝升咸與唱和詩文有才子之目由任子授中書舍人性豪邁喜交游年未四十卒所著有孝廉船虎鼠齋等集

周烈字承菴甘貧力學與同學蘇澤民周潢王瓊李先香李世澣黃功偉尹進等主會曲江中順治丁酉鄉試澹泊眞醇門無雜賓不營田產惟以友愛兄弟訓課子弟爲業郡人目爲端士

甯相武字爾佐性醇厚喜讀書當張左兵燹後家業蕩然以授經爲生無戚容客至把酒論文經日不倦語世事則不答

邑令蕭常與往還絕無請託居鄉謙和雖童幼亦未嘗慢柳鳳曉字上林性豪俠不拘細行事關利害及里人有不法者直言無忌事後咸信其無私逢故人子弟資助教誨惟恐不至長於知人有令器必拔而教之人服其藻鑑

王瓊字赤雲少好學爲諸生有聲中康熙丙午鄉試素履純潔不事干謁撫軍周召南聘爲子師未幾辭去或問之曰束縛酬知己蹉跎效小忠誦此二言嘗爲太息不謂身自當之也吾輩措大俯仰鉅公之前雖小有沾潤然所謂澤雉畜樊神雖王未善也癸丑試銓部例授縣令值滇黔變恐污僞命匿深山得免年五十卒子樹美亦食餼志行酷類其父

林廷用字殿颺號雲峯庠生夙負雄才任事慷慨滇氛初熾

長沙縣志

卷之二十三 人物一

三十六

以薦入 安親王幕中與建義侯林同著勞績邑中修志建學諸務多所經畫晚年建祠修祀典設條約延師訓子家聲不墜

廖元度字大隱庠生通經史詩有法度歷覽名山大川所至傾倒著雪蕉堂集嶽遊草粵吟等編滇逆變後流離奔竄僑迹梵宮著覆巢猿嘯等集晚築息機園杜門不出銳意蒐羅上自黃農下及

國朝共六十四卷名曰楚風補昔廖道南爲楚紀元度復有楚風補何廖氏之代有功於楚也其子璞醇謹質直亦克守父書

駱化麟字苑遊貢生貫穿經史百家一於文章發之尤工吟

咏古風絕句源出杜陵五七律東坡劍南後勁名重一時當事如堵允錫等皆與唱和一時傳之

劉之基字子肇貢生早歲試輒冠軍工詩古文辭性擴落不營家產甲寅變後羅士者脅以祿位堅辭不獲遂祝髮爲僧己未長沙恢復辛酉歲薦斂蹟深山教授生徒一羶自擁晏如也著有四書解易經解制藝千篇詩詞雜著數萬言

按通志府志選舉類俱載劉之基係長沙貢生劉定基係善化貢生府志人物類註劉定基爲長沙貢生舊志選舉載之基而人物復註定基查之基長沙實有其人府志舊志之選舉人物兩處互異今附記之

柳爾煥字子旦庠生磊落骯髒與人寡合研精太乙奇門六長沙縣志

卷之二十三 人物一

三十七

壬之術言事多奇中滇逆下長沙勢頗熾煥曰此浮雲之過太虛耳 和碩安親王招至幕中旋辭歸當事有自川滇以重幣迓者皆卻不顧鶉衣藿食瀟洒自如年七十餘預書告終時日而卒

劉灝少嗜學博極典籍旁通天文樂律諸書吳逆陷長沙餌以僞官託篤疾卻之旋遠避逆平親族多失業灝破產周急故人周某將死以幼子及遺金託及長則藏金宿券封識宛然子其芹雍正己酉舉人任道州學正

舊志選舉門載雍正己酉舉人乃魯其芹

董鈞字萬鎰號石齋早失怙奉母孝謹苦貧力學甲午舉於鄉性純篤教授生徒館穀所入悉公諸弟任臨淮令調望江邑豪有造僞符累民者繩以法詳免浮糧八十餘石及舊規

松板之派修公廨完城堡治績甚著清白自矢年六十七致仕歸二載卒

侯定遠字幼昇穎異好學年十七補弟子員 和碩安親王征討吳逆定遠以諸生獻策幕府招降措餉多所採擇不尸其功平居慷慨急公邑中均糧減則諸大務力任經畫子孫鼎盛年八十二歲

周承旦字震侯長沙人善邑庠生性剛直面折人過人皆畏服丙戌旱荒承旦居長湘接壤荒尤甚出粟三千石賑之全活無數滇逆之變徵役浩繁承旦咄嗟辦理官民共倚捐修橋梁率費數千金其子彬炳煥錦能世其業孫曾鼎盛

長沙縣志 卷之二十三 人物一 三十八
文人合字介菴甫四歲祖母失明舐之復愈父病躬滌澣器衣不解帶兄早逝視姪如子分畀田畝涉獵百家尤精天文癸巳中副車閉門著述與名宿詩歌唱和年八十預書歸去來兮於門是秋卒有易經講義隨鳴錄

陳宗彝字彝子廩生性簡重敦實行與弟宗黃白首怡怡無閒言事繼母李氏如所生經理公私差徭邑中賴之時民風澆薄宗彝日以敦本務農勸其鄉族婚姻喪祭一遵古制建宗祠置祭田十餘石族中不能具婚喪者出金粟佐之終彝之世無流落失業者生六子次大賓選綏甯司訓辭不就大能大功大士大忠大德皆積學立品名噪宮牆卓有父風孫曾百餘科名迭起方興未艾云

墓在瀏陽石牛陂夫婦合冢有墓田碑銘

魏宗衡字二缸性行端方學有源本稽古宏博手不釋卷經

史疑義隨處訪釋孝經衍義校正特詳康熙丁丑嶽麓書院
選建齋長學博胡聽巖公薦敦請固辭不出閉門著述有移
菴隨筆小學人物考其子璠琛恪守庭訓能世其家學云
楊仍荃字馥菴少孤事母至孝勤苦力學十五補弟子員十
七食餼有聲鬻序然數奇屢入棘圍不售猶復發憤研究以
著述自命時賢咸加稱賞緣攻苦致疾自知壽不永時年二
十八因號甘八翁謂吾不自翁誰復有翁吾者果以是年卒
識者至比之李長吉焉友人孝廉朱奇政爲立傳

易啟漢字瞻雲庠生生母係父之側室生母卒泣血期年不
御酒肉事嫡母郝以孝聞有大盜數十入室漢倉皇逸去聞
嫡母哀號聲急還跪曰速殺我無苦我母盜灼以火不動時

長沙縣志

卷之二十三

人物一

三十九

漢年方十七郝已八十盜詰曰此豈汝母邪漢曰但殺我全
母無多言詰郝郝以實告盜驚曰此孝子也歎息而去漢幼
鞠於兄啟萃萃析產將與均分漢曰諸姪年長兄又多應酬
我何忍獨享腴產決不受與諸姪均分

張承煒字雯若號定齋長沙人入善邑學貢明經

府志人物傳亦列善

化蓋當時長善可通考也

嫻文學尤敦孝友康熙戊辰煒年二十七父朝

楨適郡夜羣盜劫其家煒冒鋒負母袁氏匿免居喪食粥飲
水葬後始飯塊次患癰夢父手摩患處癰遂愈兄弟皓首怡
怡生平善行多尤以佐父朝楨丈量邑田均糧減則爲最司
鐸溆浦申飭學規敦尙實行卒年七十六子孫詩書科甲至
今不替

羅有望字賓門號竹漪貢生性孝友五歲失怙卽能娛母
沒哀毀盡禮不食者屢日以田一百五十畝讓兄學使薄有
德題其門曰眞儒之徒

徐瓚芳字三緒號雍齋性嚴毅通經學究心周禮治家不信
浮屠父早喪事母李氏極歡母病革不能食瓚亦廢食母卒
寢苦枕塊三年友愛其弟白首同爨其再從兄無子寢疾瓚
以口進飲食親除穢溺不眠者月餘比卒扶厝哀感旁人

朱天章字衣雲號虛山廩貢生幼穎異年十二能文少孤三
丁父母艱哀毀骨立春祭奠猶作孺子泣好學不倦專精
易學築小齋顏曰洗心手錄古今格言爲一冊號洗心篇族
黨缺乏分租助之貧者有病濟以藥餌子弟有志而力不逮

長沙縣志

卷之二十三

人物一

四十

者延師課讀多所成就

榮銓字衡臣父母早逝依叔父事如所生撫兄遺孤以祖業
付之居附郭康熙辛卯舉於鄉非公事官長不獲一面獎勵
後進諄諄不倦闢齋授徒從遊甚眾有讀書以貧廢而爲傭
者銓勸之學周其匱乏竟成名去雍正丁未以知縣試用卒
於秦中

趙永懷字念昔而忤子弱齡能詩寓廣陵湖州太守吳園次
愛其才以女贅之丙寅返長爲其祖洞門入鄉賢修祖墓有
踞其田產者檢原契焚之家貧喜客花晨月夕暢飲豪吟尤
篤友誼故交關玉山客死養其妻子迎櫬歸合八棺瘞之分
宅解衣終身不懈壽八十無疾而逝自號環莊處士

朱嗣英字賁若廩貢生嗜學能文試輒前列事繼母余氏曲盡愛敬性恭謹燕居必整衣冠貧乏罔不周恤子奇政康熙丙子鄉舉大挑赴同安任戒之曰居官以清爲本有玷缺終身以贓擯矣我非資祿養者汝慎旃哉選沅州學訓導甘恬退力辭不就年八十卒以子奇政

勅封文林郎入鄉賢祠

高文魁字元士號逸齋剛毅不阿事父母能盡禮族人貧者分贍以田親戚孤幼者力爲維持傾囊不吝晚舉一子教飭不少姑息後援例選經歷以老固辭惟適意林泉延師訓課孫曹拔振烈登賢書列成均入鬻序皆其遺教也

柳鳳止字大誠八月而孤事母金氏以孝稱刻苦力學補弟

長沙縣志

卷之二十三

人物一

四十一

子員遇事慷慨邑中興革大政多資籌畫母沒哀毀成禮忌辰悲奠有從弟幼孤代理差徭及長悉還其業蠲租焚券急公樂輸年七十五卒遺命諸子曰我所不瞑目者母節未彰耳言訖而逝生子六人兩列明經四登庠序請

旌建坊承父志也

張承煌字用晦號覺齋邑廩生性恬淡舉止方嚴讀書攻苦過度膺目疾援例入貢執親喪饘粥盡哀與兄承煒友愛老而彌篤授桃源儒學奉委督運以軍功加級勤訓課清復學租貯爲修葺

文廟之費紳士感之告休日徵詩伐石畱遺愛焉

魏琛字廷獻增生詩文雅潔氣局過人仿古昔睦族法創祠

堂明祭典家範整肅學憲習窩扁其堂曰克敦實行雍正五年舉優行授興甯訓導在官三載勤月課修學宮嚴優劣恤寒微後攝桂東學事卒於郴士人痛之護其喪至家成禮而去

毛士澤字霖沛號梅塘貢生髫年穎異立品端方閉門課讀手訂講義以訓兒孫後授綏甯司鐸惟以端士習正文體爲先務同懷弟士溥號泗山立心制行亦如士澤生平砥礪兄弟中有師友之誼焉屢舉優行人稱爲二難云

蕭世京庠生三歲失怙鮮兄弟惟母氏是依弱冠補弟子員莊顏正色規步矩趨見者起敬自壯至老一字不入公門周貧乏焚逋券有古人風訓子以義方琦珂皆登鬢序

長沙縣志

卷之二十三

人物一

四十二

周廣運號溥齋性端莊寡言笑弱齡失怙哀毀倍至祇事兩兄怡怡無閒長兄凱運沒撫孤姪如己出俾成立延師課子一門之內七葉俱興

羅世泰字繩武號敦夫立品端方家貧嗜學補弟子員父早喪母九旬兄弟協和孝友見稱居喪必誠必敬田廬粗具卽止置祀田數十畝立家訓十則里中無行者畏泰知遇荒歉倡義助賑無德色室東構三樂堂教授生徒子四人聯登科甲源漢位尙書源浩任觀察源渭源江以舉貢選官

源漢自傳

黃裳字在中長沙人善邑明經品行方正丰度森嚴共推文章宗匠陶冶後學各因其材遠近學者造請無虛日生平咳唾珠璣遺稟惜多散軼子孫俱世其家學

左之瀚字嵩質貢生事父母以孝聞友愛兄弟老而彌篤家無餘貲喜置書詩文各體膾炙人口絕意科舉闢學圃草堂教授子姪宗族鄉閭之俊咸受業焉

朱奇政字平齋丙子舉人榜名奇珍仁明方正積學能文有吏才任同安令除市豪別監獄葺先賢祠墓賑饑民革私派嚴保甲平爭訟建學修志三年之內百廢具舉以父老乞歸士民肖像祀之父服闋補石城旋調湖口值旱減耗省獄署門自責應時澍雨石鐘有浮屠宅地絕勝改建義學聞高士某山居雅不爲當事屈徒步延訪政事一如治同安時復以母病乞歸自是遂不出飲酒賦詩十數年卒所著有易解詩古文各一集

長沙縣志

卷之二十三

人物一

四十三

文山字衡峙介菴子也性敏嗜學端方有守幼無兄弟介菴親課之五經四子周禮左傳諸書自少至老朗誦不差庚子以易魁鄉試性恥干謁惟杜門漁獵經史晚年破產建祠族黨稱爲眞孝廉無嗣撫姪師爽承祀

榮大順字悌則少失恃事繼母張如所生性穎悟爲文蹕厲風發父銓愛之弱冠補弟子員膺雍正乙卯選拔舉於鄉乾隆乙丑明通授黔陽教諭捐修學宮建文峯塔及育嬰堂與諸生講學委曲指譬多士日蒸蒸然務學砥行初大順爲諸生時遭父喪哀毀骨立田宅皆推讓諸兄諸姪無依者教育之聞繼母訃及諸兄相繼逝痛悼成疾卒於任士思其教尸祝不忘

閻世亨字會菴號白沙廩生丁丑選拔授教習辭歸貫穿經史百家問業者履日滿著有髻麓軒詩文及詩經精義諸集惜被回祿無存生平端嚴好禮雖燕閒必整衣冠故舊相接終身無戲言於族黨姻婭周其貧寒佐其婚嫁又置義田於臨湘都以贍族癸卯歲饑捐穀四百斛以賑貧者慷慨樂施善難枚舉 上憲以魏闕耆英額其門子五昂晟昱昇昇克世家學

楊嗣震字子方號靜齋溥五世孫也少孤嫡母于氏教讀八歲能文通五經尤精於易著易經待虛十五卷畱心經濟獎勵後學歡事兩母友愛二弟仲弟早喪撫其子如己子太守崔聞其賢言於大中丞趙聘掌義學

長沙縣志

卷之二十三

人物一

四十四

李仲偉庠生慷慨好施風流洒脫結納名儒常云座上客常滿尊中酒不空吾無恨矣年九十四卒至今子孫富盛邑產鳳尾蕉俗名鐵樹六十年一開花偉年三十時手植數本年九十花開延邑中名宿轟飲十餘日以自慶亦僅事也

熊夢昌字西牧號松山幼有至性慟父早沒泣血三年端慤淬品平生未嘗以一楮干有司勤苦力學肆志林泉詩文自娛有蕉園愛竹山房詩草課子時藝

楊鵬字南溟父祖光死耿逆之難蔭仕長沙標營守備因家焉少倜儻有大志長知書史歷任山西遊擊辦賑公允晉撫蘇克濟薦陞老營堡參將署大同總兵西陲用兵總理肅然旋補山東沂州副將再陞河南南陽總兵所至革陋規飭營

伍移鎮襄陽值水災百姓流離捐俸助賑撫綏備至全活無數文武通材忠藎世著古儒將無以過之

楊忠秉性孝友十歲生母卒繼母蔣性卞急秉能承順蔣患痘疹潰爛秉夫婦奉飲食親牖廁月餘目不交睫及卒盡哀盡禮弟兄俱早逝撫諸孤如所生友人徐將鬻女贖罪秉代償得釋焚券施藥善難枚舉

易啟萃字九有邑庠生事繼母郝以孝聞性剛方嚴毅鄉黨畏敬之好施與嘗分產數百畝贍貧族遇鄰里飢寒冬則周以綿布荒則減價糶穀邑令青岑劉榮高其義特請 上憲賜額旌之曰善蓋星沙

張應壇字杏掌庠生性耿介重然諾祖先世居赤山坪建有

長沙縣志

卷之二十三

人物一

四十五

宗祠鐫譜牒以睦族眾設家課以教子孫兩弟一子一姪聯登賢書

王樸字素菴瀏陽庠生長沙人幼渾樸父愛之命名與字如其人少孤奉母以孝稱一姊早年苦節復因痛子臥病樸迎歸調理躬親藥餌終身不懈姪雍熙幼孤樸攜歸教之成名後爲置產其他善行尤多

林廷策字素存庠生少孤克自樹立端方樂善壯年失偶不再娶年荒減糶濟貧前撫布蘭泰聞其風賜以朱子全書百壽扇方竹杖等物卒年八十七歲

楊容字蒂甌庠生少孤痛父早喪善事祖母范氏比卒哀毀盡禮事母劉亦如之居身質樸家甚貧得館金必周鄰里自

甘饘粥至老嗜學有疑輒籍記之無少長悉諮詢焉年六十
九歲卒

饒敏字季穎庠生事父母以孝聞輕財好施不責報撫兩姪
鏌鑑爲子晚舉一子萬鎔均析家貲鑑服官清潔愛民能體
父志雍正乙卯以撫子鑑

勅封文林郎壽八十六卒

陳大夏字禹音庠生與從姪雲鵬性俱峭直族黨無行者常
畏兩人知鵬收族輯譜夏以壽終而無嗣歿之日鵬盡哀禮
擇夏弟大勇次子雲黼爲嗣

歐世衍字銳上庠生性敏慧凡書過目悉記弱冠補弟子員
後患目眚棄舉子業適志林泉持身謹厚里中或以非分相

長沙縣志

卷之二十三

人物一

四十六

加置不與較人咸欽爲長者卒年六十九歲其子明亦讀書
自好克遵父訓

姚邵嶢字致菴廩生十歲失恃事繼母黃不殊生母兄弟析
產餘田盡分幼弟鄰人數侵其地嶢義讓且作詩遺之有滄
海桑田自古今之句杜門讀書著作甚富課訓生徒貧者不
計脩脯遊其門者多所成就

陳文遠字自邇號星圃穎慧好學博覽羣書凡詩古文辭下
筆清疏雋逸以五經入泮食餼丙辰登賢書丁巳考授鑲黃
旗覺羅館教習訓課嚴而有方

天潢貴胄咸加愛敬生平慷慨任事宏才肆應邑中興建諸大
務雅爲當事所諮詢丁卯聘修邑志臧否人物一衷於義邑

某內行不修其子挾重金求立佳傳公艱然曰嗒柰何以私故污汗青乎竟黜之後無恩者年未四十賫志以沒

喻良字佐臣性孝家貧年十五卽能竭力供子職父卒哀泣至血出一目傷幾眇歲時祭掃必親至墓前一夕宿於墓夢一老父告之曰此地大不佳棺朽且盡矣明日掘視果然人以爲孝感所致母游氏好施與見鄰婦孤貧及老嫗之爲丐者必解衣衣之良承其志輒市新衣以進年六十餘事無大小必請命於母母病雖穢污躬自滌洗及卒哀泣如嬰兒設父母遺像日供飲食事之如生存與弟賢友愛尤篤相距二里無日不往返兄弟皓首怡怡如童子時一夕夢母呼曰起汝久不省我我念汝甚良驚起大呼泣曰吾母安在家人

長沙縣志

卷之二十三

人物一

四十七

驚覺良顧謂曰噫吾死矣越四日果卒

見通志

余超至性過人父巍於康熙丙子冬避仇難蒼黃策蹇驢衝風雪僮奴皆逃散獨超以五歲童子泣尾其後走數十里仇黨追及之感其孝勇斂手而退父歿年十五與伯兄異籍別財土田礪确零星者先自指取兄歿經紀其租稅出入絲粟籍記待兩孤就學就婚皆有成立築詒穀草堂廣貯經籍以啟後人尤喜與人講論孝經小學每向北則起敬曰京都在焉卒年七十四歲

見續志

李暹字復旦庠生穎悟力學康熙初吳逆蹂躪暹糾眾固守寇至互相救助鄉里獲全

周正虎字文炳職員生平存心利物雍正初襄事育嬰堂及

沱江渡竭力經營其子天修亦克體父志力行善事孫慈事母以孝聞

周垂典字贊五號愛蓮性嚴整貌奇偉膂力絕人讀書過目成誦獨不喜習帖括業所誦惟取一篇精華無完誦者行文不苟同時尙古樸清剛三十餘始補弟子員康熙庚子科惠仲瑜以古文大家典楚試得其卷拍案叫賞遂獲雋屢躋禮闈觀政部中三年出任湖北當陽縣八載洗手敬職百廢具舉值大旱制府孫文定公嘉淦齋戒祈禱三日後省垣得微雨各郡縣咸入賀爭言縣治得雨狀典在坐默無一言郡守甚之亦不應制府乃問當陽得雨否典抗聲曰當陽點滴皆無既出或咎之典曰縣未得雨民心惶懼何暇爲諛詞以博

長沙縣志

卷之二十三

人物一

四十八

上官歡制府夜召入勞而勉之後以疾解組歸初典爲諸生時有薄田四十畝及歸盡售以償宿逋其廉介正直如此甯鄉王文清銘其墓曰豪傑挺出文武之資獨來獨往不可方思慨當以慷鱗甲之而吁嗟乎墓前一片石爲當陽人士墮淚之碑

常琬字英懷號樓山雍正甲辰舉人庚戌進士以知縣卽用授河南洧川令興學校捐廉建書院置膏火田四十餘頃調南陽丁艱服闋補官江南儀徵歷宰金山清理積案無畱牘積勞成病告歸卒於里子孫書香繼武

石敏迪年十三補弟子員事親克孝弟婦榮氏矢節迪以其次子嗣極力顧恤之時值歲歉糴穀米周濟里黨全活甚眾

優行聞於大府雍正八年都察院趙宏恩觀風院李徽給以士林雅望匾額遠邇榮之

周士進字旭旦號醒痴由廩生中雍正甲辰舉人乾隆戊辰選授浙江餘杭令一意爲民梳痒剔蠹富僧某被誣欲以賂免爲直其理而責其行賂合邑頌之性喜獎藉人才偶微行聞苦志沈吟聲訪知爲署前菜傭子縣試賞其文拔冠童子軍其人旋登賢書解組後惟圖書數篋寄羅南川詩云存積舊書看到底蕭然還是未官貧浙闈分校中秋賦詩云頻憶風簷曾跋燭今宵寒月照吾心想見兩袖清風一片冰心之概

長沙縣志

卷之二十三

人物一

四十九

劉曄潭字湘客號達齋生而穎異器宇不凡雍正丙午登賢書丁未會試以薦卷選授新田教諭庚戌捷南宮擢戶曹治軍需以辦才著出守廣西泗城尋署梧州調潯州仍補泗城卓有異政緣粵西水土惡劣染瘴氣稱疾歸里卒年七十歲宅衷仁厚風度端凝孝友性成城府不設居平訓子姪以砥行爲要服官清慎自持恪勤盡職宜其後嗣之昌熾云

羅源漢字方城號南川賦質醇粹穎異好學雍正癸丑科進士入詞垣乾隆丙辰年授翰林院編修時同郡彭維新官大司農桐城方苞官侍郎教習館中新進源漢最蒙獎進相與有成已而典試粵西浙江視學粵西直隸順天歷都御史遷侍郎洊登工部尙書年七十五卒於京邸前後立朝五十餘年寅清端恪崇實黜浮德性文章事業朝野交推謂於彭茶

陵得其正大於方靈皋得其精純非虛譽也詩律春淡和雅
書法蒼古遒勁卓然成家石刻傳播藝林海內稱重
周宣猷字辰遠號雪舫雍正壬子舉於鄉癸丑成進士選授
浙江桐廬令調海鹽令尋遷分司鹽運判所至事無難易治
辦裕如公餘以朋友文章爲性命與浙中知名士相酬唱時
集諸生考校手定甲乙上官重之檄理會城書院以勁直被
蜚語罷官乾隆辛未

高宗純皇帝南巡迎鑾獻詩給復原銜退閒林下課子姪多成就卒
年六十有三著雪舫詩鈔史斷史記難字南北史禪古文柯
椽菴蔬小草眠雲集禾中雜咏開雕行世惜板片朽蠹無存
周宣徽字慎五號湘濤雍正乙卯登賢書乾隆丙辰會試中

長沙縣志

卷之二十三

人物一

五十

明通榜授永明縣教諭不立崖岸日引諸生相劇切以才守
兼優堪膺民社保擢山西高平令爲政廉平不苛訊獄非巨
盜不加重刑丁艱起復補柏鄉令調赴密雲感疾不起卒年
五十五兄雪舫爲之傳曰不汶汶以隨塵不赫赫以邀譽日
計不足歲計有餘循吏之謂也是可据爲定論

周克開字乾三號梅圃乾隆丁卯科舉人中甲戌會試明通
榜引

見發甘肅以知縣用值軍興協辦軍務署張掖古浪授隴西調甯
朔以最擢知固原州嗣補雲南姚州知州擢貴州都勻府調
貴陽府緣事罷復用爲山西蒲州府調太原府陞江西吉南
贛甯道署布政使事因公屣議効力軍臺贖罪以同知用署

江甯府事除九江知府調南昌府未幾擢浙江糧儲道任事有風力盡革陋規不取一錢值改建海岸石塘調杭嘉湖海防兵備道上官委開督修海塘當潮汐之衝每苦墊陷開冒暑晝夜不離工所積勞成疾年六十有一卒士民悲悼相與言曰天胡不畀終惠我民耶大吏以聞

上深惜之性素勁直不依阿骫骳以取容所至皆著治績善治獄平反必當其罪於威勢無所瞻畏以此取怨怒勿恤爲民興利必計長久在甯夏治渠建閘民謂之周公閘在太原修復風峪口堤堰以除水患太原民於堤上作周公祠桐城姚太史鼐撰墓志銘云矯立其義惟堅以毅惡恤予忌奮襄民事辨害興利河壩海澨生爲良吏沒而民祀皆實蹟也

長沙縣志

卷之二十三

人物一

五十一

周鳳儀號韶亭郡廩生乾隆甲子舉於鄉初任安鄉教諭敦風節獎進士類報滿授四川江津令因其土俗多所興革民甚便之縣故多訟每晨起視事案無畱牘會

王師征金川檄赴行營軍需旁午代理者幾誤事儀白諸大僚歸自部署不數日而集以軍功例得超擢堅請終養解組日邑人走送泣下歸田奉母甫三年卒

方顯德弱冠入武庠乾隆丁卯改應文試補弟子員中本年鄉試任武陵學教士有方甲午銓選陝西署山陽丙申任宜川丁酉邑大雨雹傷麥民不得食詳請減糶時麥價昂捐廉以補不給民咸德之母年老告養旋里以壽終

余廷燦字卿雯號存吾少穎悟讀書詒穀草堂深造獨得下

筆如行雲流水不主故常年二十三補弟子員二十五登□
書三十三成進士告假侍父超疾四年服闋散館授職檢討
兼充三通館纂修官旋以兄廷桐故母陳氏年屆八旬陳情
歸養十餘載服闋補官復因恙告歸先後應聘主濂溪石鼓
淥江城南書院講席其學以濂洛關閩微言泝源洙泗於金
谿姚江陽儒陰釋諸論說別裁不少假借平居衣冠必整終
日危坐講讀不倦成就多士有泰山北斗之望壽七十卒於
里門生平敦孝友踐履篤實刻意經心傳髓於天人性命律
呂勾股之學俱究窮本原著存吾文集推

當代古文正宗

劉校之字中壘號書臺乾隆丙子舉人辛巳進士以庶常分
長沙縣志

卷之二十三 人物一

五十一

習漢書散館授檢討典試浙江得人最盛甲午授貴州學政
以轉移士習爲己責歷官詹事府左右贊善轉中允侍講乙
巳改授戶部山東司員外郎陞戶部廣西司郎中平生行已
剛介接物謙退和平立朝貞誠醅質不激不隨癸丑疾卒年
六十有七

徐士範字楷儀號正亭早歲補弟子員性剛直樂善急公乾
隆十七年壬申

恩科長沙無中式者範倡邑人士增修 文廟終日鳩工庀材凡
棟楹桷瓦蓋瓦級磚綜覈精密無晷刻暇閒治舉業癸酉八
月八日從工次入鄉闈眾匠作爭攜考具以送榜發範中式
時監臨爲桂林相國陳文恭公邑侯張天如具白所以公歎

曰此 聖人在天之靈也邑人士每樂道之其他倡捐義渡解推族里不一而足晚年補沅陵縣教諭在任六年告歸壽八十八無疾而逝

汪應綬字元度號紫巖乾隆己卯舉人授直省龍門知縣改廣西靈川知縣遷通政司經歷廣西鎮安通判循良不愧直節可風除水患禦悍夷卓有政績年七十卒於鎮安任貧無以殮殤獠哀弔立祠感馱巖

陳士雅字汝青號每田幼穎異力學乾隆乙酉舉人丁未進士入詞垣授職編修以母年老乞

恩予告歸養歷主朗江城南石鼓書院講席嘉慶丙辰丁艱服闋仍主講城南從遊日眾其講學以黜華崇實爲要性極嚴正

長沙縣志

卷之二十三

人物一

五十三

甲子無疾而終所著有考古辨正春草堂時文及詩古文詞行世

楊和春字景翔號南屏邑增生聰慧嗜學丰骨珊然工詩古文詞年二十四以療疾沒沒之前一月手書旭字不休人問之曰吾數恐盡陽九後果以九日卒善化郭昆甫哭以詩云莫憶詩筒與酒巾孤墳三尺孰爲鄰揚雄著述侯芭好李賀交遊杜牧親今我獨存君白骨古人同恨鬼青燐悲歌欲當平生哭已作千秋淚盡人所作詩文昆甫欲爲之梓行纔取去而昆甫卒於京邸遂散佚無存

易伯晉字至元號雲莊貌昂偉質木口無飾言少讀書潦倒童子隊中舌耕以奉親甘旨歲己亥值旱荒失館家居偶出

遊拾橐金於道坐待其人訊而還之其人泣曰吾貿易喪資數百茲存者五十耳微君吾不獲生矣謝之堅不受邑令華州党兆熊考試賞其文拔冠童子軍明年遊泮肄業城南書院中丞黔西李世傑見之誇於眾曰生所謂紅紗照面者也生平孝友忠信里黨推重年六十八歲無疾而逝子世廉中嘉慶辛酉鄉科

彭運升字九階少失怙長慎交遊於一切義舉毅然自任乾隆戊戌後爲母壽數蠲佃租以萬計嘉慶戊辰病篤諄諄以會城育嬰堂驛步門外義渡未及捐田以助爲歎其子定楚等奉遺言將置買湘陰莊田貳百壹拾玖畝零原價陸千餘兩捐入育嬰堂義渡兩處以成父志十九年題請

長沙縣志

卷之二十三

人物一

五十四

旌表建樂善好施坊於王城隍二十一年以子定楚議敘守禦所千總

誥贈武德佐騎尉

張應塾字菊邨號東門歲進士張承煒第四子由廩生中乾隆丙辰

恩科經魁文行交著任綏甯教諭訓迪有方綏甯人稱爲東門夫子云

常鶴字芝田號警堂性端謹好讀書中乾隆庚寅舉人先補新田訓導後補新化教諭修理義學每日督其子與諸生共講習學中人士成就甚夥其子道沁道滋道治均登賢書以文名於時

周有聲字希甫號東岡梅圃觀察之長子也幼聰慧喜讀書年十六補弟子員庚寅領鄉薦官內閣中書乙卯成進士仍留中書兼文淵閣檢閱適黔省以狝苗之變請員借挑知州赴黔辦理軍務裕如也補鎮遠通判除煩去苛苗民安堵歷知思州思南大定貴陽四府護貴西道性廉介不受苞苴同僚論事怡怡然不肯以盛氣凌人事上官以禮不矯同立異不依阿取容遇大獄時有可否清理積案卓有政聲以失察小錢被議無田園房舍負債累累東岡嘗自言吾固不願作富家翁但求償清夙逋無使人受我累足矣嗣因戚友之請入醵復官百菊溪總督兩江奏請

特發南河委用李家樓工竣署松江蘇州兩府事委赴徐州勾當

長沙縣志

卷之二十三

人物一

五十五

賑恤事宜復委總理下河工務洗手奉公勤力敏事日事奔走吟咏不輟著東岡詩賸年六十六以勞得疾卒於興化工次其子鳴鸞鳴鷺奉東岡柩歸葬於淳化都之新塘衝無錫秦瀛銘其墓曰猗與先公未究厥施君又連蹇竟止於斯彼齷齪者乃鳴於時欲起而踣天胡阨之君魂其歸湘江之湄我銘其藏我心孔悲

鍾啟貴字榮士國學生性篤摯喜調卹乾隆戊戌歲歉出穀一千六百餘石減半價糶賣全活甚多里人德之又出穀一百五十石以贍宗族子鼎領乾隆己酉武闈鄉薦孫曾蔚起皆其遺澤也

蕭定朝性孝友廉介自持乾隆癸未臘月於廁旁拾遺銀五

十兩卽貼曉單召人來取時冒認者紛紛其母曰爾既不貪
非分當此嚴寒盍卽以此購絮衣濟貧苦乎朝奉命唯謹其
子明漢撫孤全節克繼父志焉